



Mutne radnje bivše uprave sarajevskog „Pretisa“

Platili 800.000 KM za izmišljene granate

Umjesto plaćanja fakture Malezijcima, „Pretis“ isplatio proviziju Pakistancima • Pakistan nikada nije ni naručio granate kalibra 125 milimetara

Bivša uprava „Pretisa“ isplatila je pakistanskoj privatnoj firmi „Indento“ 800.000 maraka provizije za navodno testiranje 125-milimetarske granate, koja nikada nije bila ni predmet ugovora s ministarstvom odbrane Pakistana niti je ikada isporučena toj državi, saznaje „Dnevni avaz“.

Dvije fakture

Prema ekskluzivnim dokumentima do kojih je došao naš list, tadašnja uprava „Pretisa“ isplatila je 25. i 26. februara 2008. godine firmi „Indento“ dvije fakture u iznosu od po 200.000 eura. Provizija za navodno testiranje ove municije isplaćena je iz te-

kućeg kredita „Pretisa“, koji je nekoliko mjeseci ranije podignut u „BBI banci“ radi efikasnijeg poslovanja. Tadašnji direktor „Pretisa“, koji je potpisao nalog za isplatu provizije, bio je Jusuf Pirić.

Da je riječ o dobro smišljenoj pljački firme, govori i podatak da je „Pretis“ s Pakistancima imao samo ugovor za isporuku granata kalibra 105 i 155 milimetara, te je nejasno zbog čega je plaćena provizija za 125-milimetarske granate, koje Pakistanci nikada nisu ni naručili.

Izvor blizak Upravi ove sarajevske firme tvrdi da su pojedinci iz „Pretisa“ dobro zaradili na ovoj navodnoj saradnji, upozoravajući da je riječ

o prvorazrednom skandalu.

Nema ugovora

- Ovo što je urađeno premašuje sve okvire kriminala. Nevjerovatno je da firma podigne kredit za tekuće poslovanje i onda isplati proviziju privatnoj kompaniji u Pakistanu u iznosu od 800.000 KM - tvrdi naš sagovornik.

On pojašnjava da je bivša uprava „Pretisa“, ustvari, 2003. godine zaključila ugovor s Malezijom, koji se tiče nabavke i isporuke 125-milimetarskih granata.

- S Pakistanom uopće ne postoji nikakav ugovor o isporuci navedenog artikla. Oni su, umjesto da plate Malezijci, ustvari nezakonito isplatili Pakistancima - tvrdi naš sa-

govornik.

M. AŠČIĆ

Pezo: SIPA već istražuje

Aktuelni direktor „Pretisa“ Hajrudin Pezo rekao nam je da su navedene transakcije radene kada on nije bio na čelu firme te da o tome ne može mnogo ni govoriti.

- SIPA je izuzela dokumentaciju i već istražuju sve ugovore. Evidentno je da je bilo nekih nepravilnosti. Bitno mi da je radim pošteno i poštujem ugovore koje sam potpisao - kaže Pezo.

